



## **Hortulus Biblico-Moralis Et Asceticus**

**Pappus von Tratzberg, Franz**

**Ulm, 1725**

Doctrina 3. Desumpta ex cap. 17. & 21. lib. 1. Paralipom. in quibus describitur Davidis mens de exstruendo Templo, Israëlitarum electio, initus Populi numerus rejectô illorum consiliô, qui contrarium ...

---

[urn:nbn:de:hbz:466:1-61252](https://nbn-resolving.org/urn:nbn:de:hbz:466:1-61252)

gi, qui facilî negotiô divinis obtemperant mandatis: eò quòd in ferendo legis onere adjutricem experiantur Dei manum. Quare Christus legem suam suave jugum appellat non tantùm ea de causa, quòd gravissimò pondere legis Mosaicæ exonerata sit, sed quòd Christus fortissimâ gratiâ illis succurrat, qui lubentî animò huic legi colla submitunt. Hinc asserit S. August. lib. de Spirit. & Pat. c. 19. *Gratia data est, ut impleatur lex.* Canticorum 4. Sponsus trinâ vice advocat dilectam suam, dicens: *veni de Libano Sponsa mea, veni de Libano, veni: coronaberis.* Libanus iste Ecclesiæ militantis typus est, de quo per sedulam legis observantiam evocatur Sponsa, Christiana videlicet anima, ad Ecclesiam triumphantem ventura. Trinâ autem vice vocatur, quia à tota Trinitate vocatur; clamat enim Deus Pater *tibi.* Quod latinè sonat: *veni mecum,* aderit tibi mea Omnipotentia, vires tibi additura, si credis, te huic itineri imparem. *Veni mecum* clamat filius, Si defuerit tibi sapientia, aderit mea sapientia, quâ illustraberis: *intellectum tibi dabo, & instruam te in via hac, quâ gradieris &c.* Psal. 31. v. 8. *Veni mecum* clamat Spiritus Sanctus: ego igne amoris divini inflammabo pectus tuum, ut fervore conceptò non eas tantùm in hac via, sed & salias, aut voles: nam amor addit alas. Quemadmodùm ergo pondus etsi gravissimum, beneficiò plurimum rotularum unicò digitò tractum, altissima turrium conscendit sine labore: ita Lex Evangelica tot divinis adjuncta auxiliis facillima redditur impletu. Quàm felicem igitur reputare te debes Christiane Lector, quòd ex tot millionibus hominum vocatus, Evangelico Jugo colla submitteris.

### Doctrina 3.

*Desumpta ex cap. 17. & 21. lib. 1. Paralipom. in quibus describitur Davidis mens de exstruendo Templo, Israëlitarum electio, initus Populi numerus rejectò illorum consiliò, qui contrarium Davidi suaserant, inde secuta Dei pœna.*

N. 330. *Considera 1.* Quàm ingens sit gratia vocationis ad veram Fidem catholicam: de catholicis enim solis dicitur, quòd olim dictum de Hebraeis cap. 17. v. 21. *Gens una in terra, ad quam perrexit Deus, ut liberaret, & faceret Populum sibi &c.* Verùm quantò major hæc ipsa

ipsa censetur, tantò gravior & damnabilior est eorum nequitia, qui vocationi suæ difformiter vivunt: adeò, ut meritò eis obrudat Apostolus Apocal. 3. v. 1. *nomen habes, quod vivas, & mortuus es &c* Substantiam sine accidentibus perire necesse est, ita fidem sine operibus. & sicut homo in optima navi positus, si nec vela explicet, quò ventum capiat, nec manus exserat, quâ remos ducat, & propellat navim, optatum non assequitur littus: ita qui verâ fide inhabitus, virtutis opera negligit, æternæ Beatitudinis portum non obtinebit. *Quid faciendò? non quid tantùm credendò, vitam æternam possidebo?* quærit Salutis suæ cupidus adolescens Lucæ 10. atque hinc S. Petrus 2. c. 1. admonet: *satagite, ut per bona opera certam vocationem & electionem faciatis.* Cælum merces est, ergo illud emi oportet. Corona est; ergo præsupponit conflictum. Lucrum est; ergo pretium exigit. Terminus est; ergo viam obijcit transeundam. Non tantùm comparatur thesauro, qui merâ sorte quandoque reperitur, sed & Margarita, ad quam è profundo mari extrahendam requiritur labor. Non tantùm assimilatur fonti hortorum, qui sæpè beneficiò naturæ scaturit, sed & puteo aquarum viventium Cantic. 4. v. 15. *Quem humanâ industriâ fodi necessum est.* Etiam Dæmones dicuntur credere, & contremiscere, inde tamen salutem suam non assequuntur. Rectissimè igitur Fidem Catholicam S. Vincentius Ferrer. *Rachelem* nominat, quæ Christianum hominem mariti locò compellat, asserens: *Da mihi liberos, id est bona opera, alioquin moriar.* Genes. 30. pulcherrima sunt, quæ ad hoc propositum fusiori quidem, sed non minùs gratò calamò scribit S. Chrysoft. Serm. 23. ad Popul. *fidelem non ex solo munere Dei, sed ex novitate vita videre oportet: honoris enim magnitudo pro honoris Dignitate vivere nolentibus, fit major supplicii accessio.* Fidelem igitur non tantùm ex his, quæ ipse præstat, par est essulgere, & ex omnibus esse partibus manifestum: ex incessu, ex aspectu & ex voce. *Non ad ostentationem, sed ad videntium utilitatem* Nunc autem unde te queam agnoscere? nam sive à loco te discere voluero? in theatris & in locis iniquis commorantem te intueor, in malignantium consiliis, in foro & in conventiculis hominum perditorum. Sive ab aspectus forma? video, te cachinnantem, & dissolutum. Sive à vestitu? cerno te, nihilomeliùs compositum à versantibus in scena. Sive à sociis? video, te mundanis & peccatoribus stipatum. Sive à verbis? nihil sanum aut necessarium aut vite nostræ conferens loquentem audio. Sive in mensa? & hic major apparebit accusatio. Unde igitur te potero fidelem agnoscere? &c. hæc verba bene ponderes Christiane Lector; annon & te quoque tangant?

**N.331.** *Considera 2.* Quid mali evenire soleat illis, qui bonis aliorum consiliis non acquiescunt, suæ tantum rationis ductum sequentes. David enim, etsi virorum prudentissimus, pessimè tamen erravit, dum rejectò Ministrorum suorum consiliò cap. 27. numerari voluit subditos suos: quare peccati sui ultorem illico sensit Deum, horrendâ peste subditos ejus affligentem. Sicut homini ignota loca peragranti nil magis necessarium, quàm Ducem itineris peritum sequi; ita cum ob naturæ per peccatum corruptæ statum virtutis tramitem & veræ sapientiæ semitam ignoremus, aliorum consiliis & auxiliis obsequi oportet. Ingeniosa est illa de hirundine fabula. Hæc avis cum semel iterumque alias monuisset volucres, ut semina lini eruerent, hoc verò consilium surda aure acciperent omnes, illa quanto citius in urbes & oppida sese contulit, ibidem moratura. Cæteris deinde avibus subsidiò lini captis strenuè illudit, tuta suo in tecto sedens. Quare ò Christiane! ne tartareus auceps frequenter te per illecebras capiat, prudentiùm & piorum virorum consiliis utere: divinò probata Oraculò res est Proverb. 15. *dissipari cogitationes, ubi non est consilium.* & eruditè admodum S. Greg. Nissen. cap. 3. de Opif. humil. ait: ò rem admirabilem? sol creatur nullâ deliberatione precedente, eodemque pacto Cœlum, quibus duobus nihil potest esse par in rebus creatis. Ad solius hominis formationem Creator ille rerum quadam cum consideratione accedit: nam naturam nostram condidit velut Instrumentum quoddam, Regno administrando idoneum, quasi diceret: *creatus est homo, ut cum consilio gubernet, & ex sui molitione disceret, quò pacto & ipse reliqua moliretur &c.*

### Doctrina 4.

*Desumpta ex cap. 22. & 28. lib. 1. Paralipom. in quibus describitur Davidi zelus in preparandis ad Fabricam Templi expensis, Ejus Oratio ad Proceres de ornatu Templi & Vasorum &c.*

**N.332.** *Considera 1.* **C**hristianos Voluntariæ Paupertatis amatores iisdem verbis uti posse, in Spirituali sensu acceptis, qualibus usus fuerat Rex David cit. cap. 22. v. 14. asserens: *ecce! ego in Paupertate mea preparavi impensas Domûs Domini.* Enim verò si ad Spirituale Adificium, divinæ Majestati erigendum, se instar Impensarum habent varia-  
rum